

四庫全書

集部

欽定四庫全書

兩宋名賢小集卷一百十五

宋 陳思 編

元 陳世隆 補

玉潤小集

李彭字商老南康軍建昌人公擇從孫有日涉園集

夢訪友生

少年結客長安城妄喜縱酒同章程支離老去一茅屋

枕書卧聞長短更友生相望止百里寒夜寥闊無微聲  
夢中乘興輒見戴剡溪聊爾扁舟行覺來遲遽一榻上  
不用僮僕爭驅迎吹燈弄筆欲書寄窓前白月方亭亭

都城元夜

斜陽盡處蕩輕烟輦路東西入管絃五夜好春隨步暖  
一年明月打頭圓香塵掠粉翻羅帶密炬籠綃鬪玉鉢  
人影漸稀花露冷蹋歌吹度曉雲邊

翻經臺

五千餘卷在高臺  
內史翻時蠟屐來  
夢斷池塘人不見  
年年春草綠成堆

阻風雨封家市

往時李成寫驟雨  
萬里古意毫端聚  
行人深藏鳥不度  
便覺非復鶩  
溪素龍眠老阮作  
陽關北風低草雲埋山  
行人客子兩愁絕  
未信葡萄能解顏  
兩郎了不了解人意  
似是畫我封家市  
戲作新詩排畫睡  
忽有野雁鳴烟際

題呂少馮聽雨堂

碧澗寒侵屋幽雲夜度牆貪看山入座慣聽雨鳴廊苦  
乏陰鏗句聊登孺子牀非君無汲引寄傲學潛郎

望西山懷駒父

去歲湖湘賦凜秋聞君江國大刀頭百年會面知幾遇  
十事欲言還九休照眼遙岑落懷袖過眉拄杖立汀洲  
莫言青山淡吾慮誰料却能生許愁

唐明皇夜游圖

開元御極垂衣裳登三咸五陵羲皇白環重譯銀甃出

卜夜遨遊離未央。香車鬪風秦與虢。羅帕覆鞍真乘黃。  
赭袍錯落綴北斗。步輦優游含鏤錫。寧王玉笛上霄漢。  
御路花光爭月光。汝陽羯鼓絹帽穩。打徹參旗低建章。  
太真霑露醉玉欹。側力士傳呼聲渺茫。翠釵掛冠紅粉粧。  
金貂貰酒白面郎。君臣玩狎樂莫比。清禁喜聞宮漏長。  
若令姚宋坐廟堂。袖中諫疏神揚揚。萬里橋邊行幸處。  
後世龜鑑懷苞桑。

閻立本醉客圖

酒有何好工作病頗怪此人喜中聖藏身麴蘖勝嵒幽  
寄愁天上呼不醒春風吹開玉東西月墮參橫斟酌之  
吐茵脫帽有妙理眩朱成碧渾忘歸右相丹青果馳譽  
幻藥調成疑笑語便覺微綃古意生似聞醉眠卿可去  
半生憂患復蕭條甕中肥遁何須邀一樽桑落對公等  
盡解平生藜覓嘲

題駒父家江干秋老圖

江風颼颼江水寒蘆洲雁下生微瀾漁翁夫婦不能語

津吏醉倒船着灘其旁病夫坐箕踞持竿萬事那復顧  
懸知寧斲嬌兒乳不及宴鴻及飛鷺

魏鍊師四松畫軸

四松在澗壑歲晚乃更奇蕭然如黃綺傲岸不可追誰  
將談天口掉舌聊見移由來拂東絹寫此霜雪姿便有  
松上雨催我牕間詩翻思斲青冥採藥堪扶衰當年丹  
青手開闢造化隨既有圯下約子行何後期

徐叔明校書篆筆奇古復作丹青為予作漢江暮

鬻扇材極妙力求鄙句作此以贈

曩時徐騎省篆古逼秦相後來得仍孫毫端溟渤壯能  
回頓挫姿丹青生意匠餘酣寫便面萬里烟莽蒼何許  
捕魚郎落日蕩雙槳無勞剪吳松安用買疊嶂真欲老  
是間塵境孰非妄憐君俱入妙簡遠復清曠定為造物  
嗔覓句聊分謗

題訪戴圖

閒庭秋草積滿砌蒼苔深忽向冰紝上聊窺訪戴心雪

月俱皎皎風林互森森縱觀停艤處猶聞擊汰音終年  
剡溪曲何嘗返山陰徒言興已盡真妄誰能尋浮生圖  
畫耳慷慨為長吟

兩宋名賢小集卷一百十五

欽定四庫全書

兩宋名賢小集卷一百十六

宋 陳思 編

元 陳世隆 補

西渡詩集上

洪炎字玉父豫章人徽宗朝官中書舍人與兄朋龜  
父芻駒父弟羽鴻父俱以詩文名時稱四洪

己酉歲十一月二十六日避寢至龍潭院十二月

十五日作

徑轉橋橫水林深寺據山鐘魚告閒寂松竹媚孱顏避地欣有託依僧成暫閒東歸路不隔片片隴雲還

突兀山椒寺披榛二百年刹從吾祖卜席是里僧傳溪送無盡水林供不斷烟囊中有餘粒假息且安眠

潭黑蛟龍穴山青虎豹林隱憂何日了淹泊見冬深薄雪恨還積梅疎冷不禁平生一樽酒衰疾廢孤斟

殺氣纏中土妖徵出泰階架橋凌禹穴投策暗秦淮匪

兜歌何苦非熊願亦乖申胥雖有淚無地寄予懷  
宵旰憂雖切咨謀策靡長築壇推騎刦假節得糜芳已  
矣重江險哀哉古豫章蓬茅今在否矯首恨難忘

次韻鄭公實見贈二詩

鄭侯風槩似虞薰醉飽初疑對苾芬一日君嘗南浦水  
六年我踏寶峰雲詩情賦物已聞命山色溪光倘見分  
羣盜何曾念王粲相逢聊喜見斯文

百濯生香真寶薰中冷取水挹清芬素娥影落秋宵月

白鶴銅翻春晝雲俗客來依禪客住林花自與雨花分  
扶傾不假迂儒力敢倚筆端能綴文

寶峰讀駒父壁間詩次其韻

免迹通一線苟興度千尋隔林見潭影迎客有鈴音梵  
唱出廣殿飛舞來珍禽履此勝絕境一清塵慮心  
仲氏趣玄遠造詣非尺尋誰云千戈際獲覩金玉音七  
日南山霧一鳴幽谷禽依然拂塵壁愁絕見余心

次韻公實感寓

求田問舍轉頭空十口無家寄栗蓬失得自憐嬰世網  
是非都欲問天公綿綿不解溪邊雨淅淅無情松下風  
賴有詩人排悶作且吟佳句任窮通

次韻公實雷雨

驚雷勢欲拔三山急雨聲如倒百川但作奇寒侵客夢  
若為一震靜烽烟田園荆楚漫流水河洛干戈今幾年  
擬叩九闕牋帝所人非大手筆非椽

次韻公實喜晴二首

凍雨連三日春膏過一犁寺橋杯渡水村徑櫬行泥燠  
若生暘谷寒收豈石犀欲窮洪範理夕室有青藜  
持璧還投鵠鎔金恨作犧行吟乘曉日扶杖入春泥願  
學懷文豹終慙禿角犀徒歌無好語野飯只羨藜

馮太冲置酒即事用公實韻

故人同客寓蕭寺近清明春事一尊酒夜闌三尺檠風  
流孔北海文字漢西京苦勸加餐飯年來太瘦生

山中聞杜鵑

山中二月聞杜鵑百草爭芳已消歇綠陰初不待薰風  
啼鳥區區自流血北窓移燈已三更南山高林時一聲  
言歸汝亦無歸處何用多言傷我情

寶峰筍用公實韻

繞寺千株筍高低逐澗丘參差舒鳳尾突兀長貓頭入  
鼎資甘脆殘林且罷休會須堪小艇裁作海乘浮

公實示間字韻詩悵然有感次韻奉和三首

晴暉生燠雨生寒朱夏陽春季孟間斷雁哀猿金馬客

落花流水石門山早知蟻穴成何事欲棹漁舟去不還  
昭氏有琴無作止虧成都任一機關

輒哭人歌行路難畏人無地出人間欣逢北海孫賓石  
猶是江南庾子山野草離離隨意綠羣鳬泛泛倦飛還  
一川烟草村蘿外何處梯雲叩九關

此處非燕南趙北我琴無濮上桑間勞生聊作夢中夢  
苦語莫酬山復山觸石白雲數峰起照人明月一鉤還  
德星已為荀陳聚紫氣休浮函谷闕

漢末童謡燕南垂趙北際中央不合

大如礪惟有  
此間可避世

載酒邀公實同過西園食枇杷與公實同賦即次其韻

有美枇杷子三珍共一時朱櫻梁苑早盧橘蜀都遲載酒寧辭病窺園似好奇酬君要佳句從古未題詩

公實再賦枇杷之什次韻二首

連雲葱蒨外佳樹枇杷林味極東南美恩知雨露深山夫琢栗玉谷鳥避丸金永日羈棲意茲焉一惄心

醞釀尊中酒  
杖杷雲外林  
甘食千顆盡  
軟語一杯深老  
境宜扶杖交情得  
斲金遺民伐荻去  
真處即吾心

公實作暴雨詩次其韻

民生惟播殖  
天意在農深  
一夜盆傾雨  
千家粒食心知  
時占聚蟻催種  
有鳴禽喜是田  
間語青青刺水鍼

次韻即事二首

自媿山林士來炊  
蕭寺烟怨驚寄猿  
崔飛躍任魚鳶咄  
咄空中字昏昏  
醉後眠攜文非孟子  
何以差狂顛

寄榻逢僧夏登場喜麥秋一風將浹日四月尚重裘去  
矣吁何及歸歟幸少休雨晴寒自戢桂魄更添愁

次韻野步

意行無遠近山徑自橫斜烟月生晴嶺風幡接暮霞影  
歸巢幕燕聲散宿林鴉屣履相隨處僧垣即是家

遊都梁山

風吹古汲口雲滿都梁山執熱厭偏仄幽尋上孱顏清  
泉似石乳滴瀝岩竇間乞此一瓢飲為祛千載煩山靈

知我意殷然下層巒散空作急雨抉石出甘寒一酌蕩  
齒頰三咽紫肺肝輕軀變滯骨塵鞅思靈闕來當踏雲  
至去當御風還再拜謝神休幸汝不我慳

四月二十三日晚同太冲表之公實野步

四山蠶蠶野田存近是人烟遠是村鳥外疎鐘靈隱寺  
花邊流水武陵源有逢即畫原非筆所見皆詩本不言  
看插秧栽欲忘返杖藜徙倚到黃昏

野步

散策尋溪偶緩行。羈棲愁眼忽雙明。  
非烟幕幕平蕪合倒影。層層遠翠橫。  
鷗鷺低飛映山去。江湖一諾百金輕。  
直知已造洞天內。身在人間却自驚。

石門中夏雨寒

五年鐵騎躡中原。四月江南尚薄寒。  
入月誰能移太白。來朝我亦見呼韓。  
灌壇風雨行將戢。陋巷單瓢且自寬。  
紅日再中天地正。塗泥不辱漢衣冠。

次韻即事

端居入夏愁更新不數多愁過一春躊躇難同若士去  
取醉但與索郎親朝天幾日車同軌擊地共唱野無人  
自許世才非管樂聊將心事比雷陳

嘗白酒用麌韻

竹葉榴花久擅場一尊雲液勝椒漿人惟任達常中聖  
藥自消憂不作狂滿泛冰甕無別色錯斟瓶水有真香  
祇應刺醞逡巡酒始耐仙山日月長

庚戌歲六月四日至洪城舊廬無復尺椽悵然感

懷用丙午歲遷居詩韻

南州一炬火我歸無所歸六月下驚湍一葉正復欹空  
城何所有城闕雙闔扉遺甿四五輩睭眙蟲鳥栖潭潭  
大都府灰滅餘空基委重者誰子汝實凡且卑螻蟻輕  
民命泥沙損國貲犬狼肆噬嗤駁逐乃其宜胡為使羣  
吠如惡草蔓滋哀哉三萬室鍾此百六期故居不可識  
将是復疑非階前手種花自憐託根微露草相對泣吟  
風作悲詩人言城門火魚禍自靡遺我亦無淚哭且復

一解願

病間和公實飲酒詩

憂每傷人人亦憂花蒙兩眼雪蒙頭干戈滿地不可觸  
蓑笠為家何處浮秋入鳴蟬催暑去酒如凝露與清謀  
寫成庾信江南賦更續相如老倦游

戲和公實感秋對酒

青山愛客長青眼白酒知時泛白雲少日悲歡才一醉  
中星寒暑又平分稻粱狼籍餘栖敵雀鼠穿窬自立勲

一葉已驚秋意早映階黃落更紛紛

次韻公實七月一日雨感懷二首

平生離俗得閒多素髮驚秋奈老何賓從盤飧唯白石  
意行供帳有青蘿御風獨往松三徑踏月空歸雪一蓑  
短布單衣窮至骨醉吟不作飯牛歌

日日愁隨萬緒多遣愁不去若愁何文書引睡繙黃卷  
福地求生訪綠蘿酒厭銀瓶聊注瓦衣辭錦襖却披蓑  
五更風雨作金石助我貫珠商頌歌

韋莊蜀程記入嘉陵道上如行青蘿帳中福地記  
武陵有綠蘿福地與桃花源相接將去寶峯誦老  
杜更欲投何處賦五言三首

更欲投何處乾坤老病身窮愁但有骨柄泊渺無津岸  
穴探幽數人烟隔幾秦驅車上九折回首黯傷神

更欲投何處窮猿不擇林低回竹樹語慘戚鐘魚心邑  
邑出門淚行行渡嶺吟西江如此吸在處海潮音  
更欲投何處仙山不可窺欲尋吳許跡默與綺園期裏

飯隨妻子清秋問路岐神真有汲引逸駕或容追

奕棋絕句二首

新秋遣悶只圍碁病不銜盃亦廢詩對局蕭然兩無語  
箇中君子有爭時

鷺落寒江鷗點汀晴窓飛電擊梨聲方圓動靜隨機見  
清簾疎簾眼倍明

又

白日惟銷一局碁攬碁還誦李侯詩傍觀不作千年計

會有局成柯爛時

暴局醒心過博局棋聲娛耳勝琴聲少年此戲殊不惡  
坐隱時聞夜達明

再賦奕暴五言八句五首

荆璞玉為子井文楸作枰有求惟別墅不喜得宣城  
跕飛鶯渡丁丁伐木聲破愁逢一咲無地着虧成

祇園三日雨碧澗一枰秋試問酒中趣何如林下幽從  
它着虎口尋我鎮神頭惟悟爭先法當機與手謀

不作丹朱戲難禁清晝長敢言白玉局聊取紫羅囊角  
道空傳記乘除自有方兒童爭畫紙漫學老夫狂

眉山非快手奕勝亦欣然變態一翻覆幾微繫後先陶  
公慮太過雪女慧堪憐張弛誠吾道斯文許爾賢

凝神迷遠躅致一有全功皎皎婦姑月冥冥鴻鵠風置  
君愚竊子議樂哂溫公誰謂商山老飄然到橘中

越王山二首

朝登萬仞岡夕宿雲霞間越王昔何時稅駕宇此山山

顛有石室險絕未可攀烟樹相映帶尚想飈輪還文吳  
二仙子騰趨跨兩班俯仰五百秋下視悲人寰王室久  
蕩析世路方孔艱我尋真人居荷鋤支蓬管林泉依福  
地樵汲闡靈闕庶以遠兵革返茲後死顏

越王名茲山無復車馬跡絕頂有佳處軒然大盤石靈  
洞閥其中神池蕩其側雲氣朝夕生合散一瞬息吾聞  
王子搜隱遜辭越國玉輿去不返丹丘鏽荆棘二仙去  
季世故老猶記識遺蹤落人間不稽傳寶墨我晞伯夷

清願作老聃後脫身埃塈外挾渴望三益

嶺雲

吾居半山上繞屋猶峻嶺舉頭即見之坐卧作牆屏忽復不可求湧洞雲萬頃初疑岸谷變身不踐人境俄頃如故常突兀在屋頂隱見須臾間變態莫記省烟霞成痼疾終日常炯炯早閑金丹訣未辨卜龜井世亂一丘壑斯志或可逞鳴猿落空岩翥雀飈晴影石泉漱芳潤草木皆秀整洞天有歸路來往心已領

從寶峰長老惟足求猫頭筍

不識猫頭筍還思馬祖山庭蘭生舊莖綿錦換新斑蘊  
玉爭懷寶登盤想飫餐分甘須剝劙遠助一瓢簞

食榧子

若一作石

榴資彭糧榧實伐彭兵三彭穴身中各以戶自

名伺隙殘所託睢盱為已榮仙山無凡木榧林高且清  
八月實纍纍斗量亦囊盛盈盤得恣食不與汝糧并嗟  
汝小黠爾安所逃汝生蚕讀黃老書五牙漱琅英雖微

玉山果知汝久已行喪亂食不足長飢病所嬰蟠桃未能致橡栗庶可營作詩頌子樞期子以主盟

十月十五日山中下視雲氣自山間出已而彌漫咫尺不辨岩谷戲成五言一首

一歲下元日千山小雪天雲層生遠壑雨拚割平川放牧虛橫吹樵蘇樂靜眠遙知載酒客無路到齋前

十月十六日

雲氣依然合山蹊舊不通鑿鹽猶可問牢醴頃能空細

檻泉聲外疎籬犬吠中無人披宿霧採藥過龐公

南城鄧氏亭

小麥青青傷一曲江南千里傷春目眩母江頭喚渡人  
遙指麻源第三谷裏鹽包飯各忽忽回首烟霞樓觀中  
詩成更着羊何和猶是前身內史公

欽定四庫全書

兩宋名賢小集卷一百十七

宋 陳思 編

元 陳世隆 補

西渡詩集下

遊麻姑山仙都觀

浥露出南郭遵塗盼西嶺幽尋不憚遠陟嶮造殊境懸  
瀑濺天路高齋跨參井麻姑固神人上下凌倒景逸駕

不容迫遺蹤博塵影仙壇獨巋然蘚蝕此山頂古屋鳴  
鶴鶴汙池育蛙鼃葛顏有異聞源委渺難省空餘豐碑  
字欵若貌驥騁永言賞心遇所樂塵務屏濯纓欲自孔  
斷鼻還思郢安得斯人徒置論挈裘領聖真豈遠而炯  
炯金在鑛九淵孕明月七返悶神鴟至道如可求汲深  
顧修綆

靜思院上元日二首

麻姑山換越王山憶昨下元今上元老去休驚長客寓

春來不擬問田園畏途豺虎中原近挾日風雲四海昏  
夢遙瀟湘無落處憑誰楚些與招魂

欲趨嚴蹕萬重山且酌清尊慶改元穡事何時銷劍戟  
賢書不用到丘園傷心華屋燈如晝觸眼荒塗犬吠昏  
今日江東須管仲可憐窮寢尚遊魂

雲溪院

水竹依山住烟霞並舍分愁添中夜雨冷浸一溪雲滿  
目干戈地關心鳥獸羣歸塗如可問猛犬莫狺狺

二月十二日偶成

金谿東行二十里高即登山下臨水亂山中斷水橫流  
水際招提對山起丹青像設半泥塗野僧一飯無鐘魚  
散策閒尋筍蕨芽密林時逢桃李花

信州逢寒食

客行寒食路春晚上饒城野寺鳥鳴樂山蹊荆棘生人  
隨乘鴈集地隔一牛鳴俛首征途內官曹何日清

題盛彥光丘壑軒

盛子卜居南澗濱開軒自比葛天民一丘一壑有能事  
三浴三薰無俗塵閒逐逸人同執射偶逢漁父亦垂綸  
此軒成毀吾何預畫著岩間恐未真

代簡呈信州李使君

萬斛誰能破客愁一尊風味乏醇酸中丞自許憐漁父  
高上無端住督郵必使索郎頻有顧也知歡伯解消憂  
蘇州刺史詩盈卷還憶山僧冷病否

曉發鵝湖

萬松參嶺路千畝勸春耕不復紅鵠下空餘碧澗橫佛  
扇穿縹緲仙馭鑛崕嶧道釋分殊境藍輿許我行

古田縣

勾吳於越通舟車南走甌越城百餘鑿山架橋窮奧區  
班春不行猶一墟此邦自與桃源竝不能深藏即人境  
五百年間閩戰爭淳朴散盡狙詐生

次韻和古田縣丞方景南見惠詩

踈慵我似海鷗閒文采君如霧豹班不省流離思樂土

深知鄉往愧高山低飛乳燕聲相接小叩華鯨夢亦還  
共看圍碁欲終日忘年初在立談間

遊石鼓山湧泉院

昔聞石鼓鳴今作石鼓遊擊樹久已息甲兵殊未休精  
廬莊嚴海百室雲霧浮維時當長夏蕭颯如涼秋高崖  
不見日老木枝相樛靈泉發嵌竇下注千仞溝向來經  
行人頗以名字留俯仰百年內磨鎣遍岩幽石橋可坐  
卧清絕無等儔衆山合沓來響合相獻酬雖逢會心欣

未弭當世憂不知稽山上復有勝處否六飛尚東巡狐  
兔穴中州戈鋌塞河洛冠蓋集閩甌墮此吠雪國烈火  
爛不收炎飈方焚輪赫羲欲停輶微生類焦穀茲焉得  
依投一乘凌風翰濯纓天漢流

初食生荔枝

六月寓閩山初逢荔枝丹皺紅分顆顆凝日作團團品  
目誠無限珍甘擬亦難不勞走馬使安坐得加餐

獨擅東南美誰如十八娘唉顰俱有味朱粉不迷香璀璨

璨珠生掌清泠露入囊風流須第一  
釤座每難忘

秋日登萬歲山平遠臺次糜韻

山川信美自愁多嶺海途窮可若何  
倦客難尋越絕記  
畸人但唱郢中歌天香不入伊蒲塞  
佛水猶開優鉢羅  
還是浮雲韜白日鳳凰臺上一經過

戲次韻和了信上座

天工下觀戲魚龍分披敦物驥岱宗  
塵沙欲枯固嚮眼  
酒醴難澆磊塊胸會稽之南曰閩海  
東行萬里因雄風

二兒得邑古長樂意擬分治三山中門張羅雀即吾室  
弔影不識求羊蹤擔簷挾卷者誰氏捉筆言詩有此公  
紛紛道旁皆杏李辛苦交攻無復理入林初聞蒼鵠香  
知味自覺醍醐美今時社稷見老人它日陽休望吾子  
我觀蓬萊繞一水桐柏羅浮相對起赤鳥銜符得寶書  
青鳥拂簷來報喜君能無事如懶殘吾兒倘不慙張底  
次韻許子大李丞相宅牡丹芍藥詩

山丹麗質冠年華復有餘容殿百花看取三春如轉影

折來一咲是生涯  
綺羅不妒傾城色  
蜂蝶難窺上相家  
京國十年昏病眼  
可憐風雨落朝霞

聞師川諫議至漳州作建除字詩十二韻迓之

建武下詔書  
青海嶠識明  
主除吏得陽城  
所喜逸民舉滿  
腹懷經綸筆  
間含露雨平生  
相期心中興  
爾乎取定交  
自疇昔契闊  
及再暑執熟子  
南來五月憩漳浦  
破啼謀一笑  
預置風月俎  
危言倘可陳  
正學當盡吐成虧  
在須臾得失宜  
熟數收功謝王魏  
取道跡傅呂開茲  
衆正路

慰彼蒼生苦閑關拒他盜拂席招巢許

題園圃圖

一老滅塵慮七兒同靜緣境超法界觀身作地行仙男女非殊相丹青赤浪傳襄陽聚首話猶是在家禪

社日宇文德和送酒次廢韻

羈游苦少澤藏山老境難希藥駐顏日日尋春穿窈窕行行止渴漱潺湲忽逢嶺伯來傾蓋無數愁城盡斬關多謝天公愛狂客九衢忙裏獨偷閒

次韻許子大王豐父圓明送春之什

鶗鴂能愁物外人芳菲聊借夢中身  
要知瓊刃非凡骨信有金庭不盡春  
伯雅相將浮鴨綠素娥應共踏蟾銀  
休驚麗句同仙授王許從來侍帝宸

福州程使君止戈堂二首

甌山閩海兩高深幕府同開閱古今  
堂號止戈賢守意郡名長樂聖君心  
行看賣劍為農器即有飛鷁集泮林  
比日東南是洙泗喜聞弦頌發清音

跳梁山谷有頑民電掃風除一聚塵排闥江山千里眼  
滿庭桃李四時春定知當寧思冀遂正恐舉輿借寇恂  
誰是諸侯老賓客酣歌應許杜陵人

坐上呈師川有懷駒父

上坡諫議立清班入奉威顏咫尺天仲氏三山久憔悴  
徵君五嶺亦遷遭欣逢白雀歸華表更想黃熊出羽潤  
客舍一尊雙淚落相陪里社復何年

師川見和再用元韻

河洛中秋已凜然  
甌閩八月尚炎天  
方懷許國忠言功  
不計歸途道里遼  
子產未能忘季札  
太阿應必待龍淵  
樹人樹木有明筭  
誰謂百年同十年

鉛山縣石井院

兩年再踏鉛山路  
今日初嘗石井泉  
碧玉岩邊滄湯餅  
全勝五鼎擊肥鮮

初入浙中

松竹籠官道  
牛羊食野田  
嵒山低送客  
蕩水遠含天  
乍

聽吳兒語初逢愴父船平生足未歷聊以慰華顛

我生豫章汭游宦在京華百粵非吾土三吳亦爾家客  
星嚴瀨釣西子越溪紗一洗眵昏眼如乘上漢槎

山村柿栗熟客舍稻梁秋池足能言鴨蹊多喘月牛如  
聞息戰鬪刺欲起歌謠鼓楫臨江誓誰為祖豫州

立秋日上饒郡偶成二首

承明非厭直衰疾自投閒江漢蒸炊內盤盂嗒哈間層  
冰萬里夢謁帝九重闕顧借搏風翼追遊物外山

平生逃暑飲病著不濡唇燮齒甘瓜冷流匙香粒勻加  
餐雖意決對案已眉顰却歎廉頗老猶為善飯人

盛彥光次韻見和復用前韻因以自歎

星織烏同織鶴閒鷗亦閒問君離俗久何事落人間未  
伏秋無雨殘歛晝掩關寒泉聊洗耳清冷似吾山  
涼飈將透齒烈火謝燋脣壁織梭梭應簷珠顆顆勻隱  
憂成獨樂淺笑換深顰更上藐姑射問塗冰雪人

夢中作四言用前韻

事有怕愛語分忙閒左右前後外內中間青雲干呂紫

氣浮關五星東井微臣北山

鷁鷀珍腿猩猩美唇醴齊調適勻藥和勻老商嬉笑西  
施解蟬倦龜若士翳桑餓人

再次四言韻

執虎入圈繫驥在閑志六合外身十畝間組繫單于泥  
封函闕樂我叢桂淮南小山

曾兄衛弟虞齒號唇倚伏相因否泰惟勻履茲艱虞慎

厥笑顰水清見石天定勝人

再次四言韻

入聖有域存誠以閑德不德上材不村間堂上不冀門  
設常關鄙哉丘垤覆蕡為山

編貝皓齒含朱絳唇甄陶圓熟琢削細勻不笑不言倚  
席以顰商略有此為若而人

秋分日偶成

洪崖山下一臘儒碧玉岩邊抱病夫永日翛然無復事

人欺憔悴鬼揶揄

曾仲共和予春日登滕閣詩蓋舊詩也復次韻

西江東畔見江樓江月江樓萬斛愁試問海潮應念我  
為將雙淚到南州

鷓鴣

見江樓下鷄梅花香撲金尊醉落霞獨倚東風如夢覺  
一枝春色別人家

人日

開歲逢人日吾衰不夢周家書生遠恨客舍起離憂朔  
雪驚南眼江梅哭隴頭誰能結綵勝一為散春愁

鍾乳

鍾乳宜為粉扶衰老所便纖藏鵝管細治鍊玉椎堅石  
髓誠難值雲腴恐浪傳刀圭聊已疾未敢議真仙

葉少蘊出示鄭先覺閱駿圖為作長歌

丹青得名曹將軍畫馬已來無復人諸生韓幹受其法  
絕足亦傳沙苑真儒林望郎李公麟曹韓復生能與鄰

心胸可納天西極。純素頻空冀北羣。  
鄭生晚識李侯比。自許筆端輕萬里。  
山川初出大宛城。翰墨猶沾渥洼水。  
汗血歛沙指顧間。霧鬢風鬟卷中起。  
戲寫十馬皆龍材。前有飛黃後山子。  
葉公好尚有祖風。不愛真龍愛畫龍。  
千金不惜市駿骨。睥睨神物秋臺中。  
英雄嘗聞妾換馬。意氣欲將詩換畫。  
詩工畫妙兩崛奇。谷量馬觀未論價。  
公詩自是生驛驅。恨公不身親李侯。  
向來曹韓空白頭。和曾仲共大風折木歌。

疾風峩峩土囊口陽崖中裂陰崖吼南山喬木大百圍  
頃刻剪伐如斷臼修枝偃蹇擲龍蛇直幹崩山塞岩岫  
千雲蔽日埽地空掣電奔霆翻覆手山靈掩泣惋惜深  
匠石含悲涕洟久折臂而公黥而王精金當鎔玉當剖  
斲木剗為浮海航路指銀河上牛斗委餘猶得宮殿材  
瑣細亦蒙梁棟取萬斛之舟可勿論大廈帡幪此焉有  
狂飈卷空欲奚為壽獎金石長不朽天生大才將有用  
乖逢相因孰先後嗟爾乾風與枯柳摧杌為薪尚誰咎

楚州阻水漲懷汪信民呂居仁二十四言

江北理長淮西逝厥隩射陽城邑嶽峙鑿渠而漕首  
淮江尾舳艤崿崿連檣千里青雀翩翩彩虹嶷嶷梁跼  
舟蹐限茲黃水昔我至正得二國士簞瓢相樂汪呂氏  
子於今幾年乖隔生死梗泛萍飄乃復于此菱花淨土  
鷺羽徐起如欲我留盼睞以喜俯仰山川感念成毀一  
瞬千古寓非予心

奉送駒父師川二郎中赴召四首

火中暑退庚伏在婁赫熾方炎金石在流之二大夫服  
絲紝紝文昌臺郎祗命是憂中江有舳中涂有輶風檣  
雨轂長夏為秋白雲在天岸如岩丘倏忽西東不我告  
謀翩翩者鵠俯矚魚游將逝復止矯影河洲嗟予去國  
三葛于休止車生耳永謝鳴騶揮袂江干長嘯林幽

遷居

從宦三十載故山凡幾歸昔歸尚有屋再歸已傾欹今  
歸但喬木竹落荆薪扉上為烏鳥都下為犬雞栖相從

東北隅三畝以為基積塊與運甓實窪而培卑成茲道  
傍舍空我橐中貲堂室取即安戶牖適所宜嘉樹三四  
株當憲發華滋馨香入懷袖似與遷徙期我今六十老豈  
不知前非咨謀愚見捨就列筋力微竊食奉祠祿永負伐  
檀詩松楸幸在望鄰曲不見遺葛巾隨里社庶以保期顧  
次韻公實與用中夜話

賢哉鄭圃客去為五漿驚解榻栖雲表開憲納水聲忽  
逢京國舊相對夜燈明歎息胡証老猶思摘鉄檠

玉女峯

玉女何時見茲峰獨抱羣古容餘佛坐虛室但鑪薰林  
隱投壺電山藏出岫雲自慚非屈宋欲賦不成文

兩宋名賢小集卷一百十七

欽定四庫全書

兩宋名賢小集卷一百十八

宋 陳思編

元 陳世隆補

樸齋小集

張方平字安道宋城人舉茂才異等為校書郎英宗朝累遷禮部尚書出知鄆州神宗即位拜參知政事致仕薨贈司空謚文定有樂全先生集

送楊君西安

君過嚴陵瀨扁舟入婺溪灘長秋日短山遠亂雲齊未  
探驪龍領聊羈駿馬蹄胥江濤正惡鴻雁此東西

玉泉觀贈高道士

古屋氣象冷蒼崖烟翠中龍歸半天雨虎嘯一巖風露  
後芝房紫霜餘柏實紅終期把藜杖來伴白雲翁

寄汾陽郭先生

君家白雲外巖溜響嘈嘈絕壑風烟淡孤峰冰雪高自

能無世累誰見有生勞指我蓬壺路瓊宮隔海濤

都下別友人

海內故人少市樓新酒醇與君聊一醉分袂此殘春北  
道邢臺路東洲泗水濱相期復何處京洛舊風塵

寄郭誠思華下茅齋

舍在世塵外松扉夜不關心同秋水靜身共野雲閒自  
得通三樂誰堪話九還他年玉泉約何以救衰顏

初春遊太尉宅東池

蓬島靈仙宅  
星河帝女家  
波光泛金翠  
樓影動雲霞  
清淺遊魚過  
參差垂柳斜  
移舟更尋勝  
遠見小桃花

暮秋登彭祖樓

危樓古城角  
山色遶蒼蒼  
寒日下何速  
清風來甚長  
烟塵思戰國  
雲水似江鄉  
重九登高近  
堦前菊已香

秦州後園春讌贈部署劉几閣使

柳暗三眠困  
花繁二月香  
秦州後園有二月花開最  
早繁艷甚盛絕有清香

懷當酒盡興味為春長  
疊鼓漁陽節清謳北里妝階前

樂無誤席上有周郎

江樓遲客

靜外遊神迴望中塵物稀天連遠水盡鳥背夕陽飛木葉初搖落鄉懷動式微興闌不忍去遲子一舠歸

夜意

羣動已沉響蛩吟時一聲露寒仙掌重月午庾樓清感慨聞雞舞悲涼倚笛情幾多塵役者夙駕待鐘行

送吳春鄉赴都

法座臨軒策俊髦同君陞見預旌招疲駕十駕始千里  
孤鶴一飛先九霄蘭棹秋風行邇迤輶稜旭日勢岩堯  
石渠為謝諸儒彥行邁同趨便殿朝

蝶

遲景融融暖氣浮中園曲密小庭幽春風故引顛狂甚  
芳樹相容爛漫遊不憊風流輸楚女嬾將身世問莊周  
有時潛見多情處每遇王孫盡日留

青陽峽

奇峰疊巘無重數橫澗飛泉會一溪老樹藤蘿從古長  
寒空雲靄與天迷幽中應有神仙住深處惟聞猿鳥啼  
野性舊多山水癖恨無心賞此相攜

謁觀妙宗師值畫牋

一枕清風靜館深滿庭松檜鬱交陰此時內景人難見  
月在泥丸日在心

送沈生昆弟隨侍之博白

炎方景象異中原海氣昏昏雜瘴烟今日蠻荒成雅俗

薰風南播自媯絃

不須南浦懷消黯好過西山訪隱淪比到嶺時應近臘  
相思可寄一枝春

東連海道微扶桑北望神皋斗柄傍兩處音塵杳難接  
征鴻歲只到衡陽

夕陽踈葦暮江渭秋色蕭蕭動客思自侍嚴君領州去  
豈同騷客滯邊時

兩宋名賢小集卷一百十八

欽定四庫全書

兩宋名賢小集卷一百十九

宋 陳思編

元 陳世隆補

張章簡集

張綱字彥正潤州丹陽人入太學屢試獲首選政和  
二年賜上舍及第特除太學正歷徽猷閣待制引年  
致仕會秦檜柄國綱卧家二十年檜死起為吏部侍

郎兼侍讀後以資政殿學士知婺州尋致仕築亭池上扁曰歸喜自號華陽老人日與親舊游息其間高宗幸建康召見行在孝宗登極召陪祀以老辭乾道二年卒年八十四綱歷事四朝正直自持多所建白華陽集四十卷其子堅所編章奏居多詩僅二百餘首

赴喜雪御筵歸作

喜雪排筵曉漏催玉人傳詔下天來香隨日轉蓬萊近

花帶春回錦繡開一線新  
陰留鼓吹三登和氣入尊罍  
叨霑惠澤思歸美授簡梁園愧乏才

次韻仲弼重九

黃花白酒兩相逢  
把酒簪花對晚風  
千里故園雲水外  
三年歸路夢魂中  
自憐晚晚傷秋色  
誰解疎狂發醉紅  
寄語髯周頗知否  
此時情緒與君同

感歎子蒼有詩見贈次韻奉呈

隨緣到處是吾廬  
風雨飄颻敢定居  
異縣逢君如隔世

七年怪我苦無書平生出處皆陳迹大半交遊已故墟  
愁絕不知尊酒盡醉歸兒女笑牽裾

寄曾公袞用子蒼韻

哀艸連雲萬木風天高滅沒見孤鴻夕陽人散酒旗下  
遠浦船歸漁笛中兀兀松窗翻蠹簡垂垂蓬鬢颯霜叢  
自憐世味諳來慣已覺忘辛似蓼蟲

亂後入城

未復錢塘郡先收鐵甕城妖星隨月落殺氣逐參橫已

築鯨鯢觀重新鼓角聲大江應好在流恨幾時平  
賦隨寬詔免恩浹大江浮人少餘新市城荒剝古丘瘡  
痍誰共理宵旰獨深憂莫上西樓望黃雲滿眼愁

南洞即事

紫綬金章八十三衰殘不稱舊官銜煩君寫作歸田老  
野服翛然坐碧巖

次韻國衡

古寺憑崇岡蒼煙蔭喬木欹斜屋鱗比繚繞牆帶束何

人闢層軒延客寄遐矚醉賞菊坡下客意豈在菊念昔  
居此地名世盡儒服師曠賢多智蒼史聖重目臺成竟  
誰遊事去不容蹠梁王高帝孫名字亦不辱當時盛歌  
舞肯使後人逐陳迹今故存新池為誰綠感嘆世上事  
翻覆如轉燭請君聽鐘魚尚想吹紫玉

次韻仲弼

千里長懷北固樓客居顏巷不堪憂青熒坐看孤燈夜  
搖落初驚一葉秋已厭清談揮麈尾誰能細字寫蠅頭

葦鱸固是吾家事好約西風買釣舟

次韻李傳道感事

卧病何人為掃門墮霜黃葉任續紛旋沽濁酒難禁醉  
厭數孤砧遠更聞冉冉生涯飄似夢悠悠心緒亂如雲  
幾時得遂江湖去野性終隨鷗鷺羣

送春

滿眼鶯花自在春送春情緒怯愁新鼓琴不用戴安道  
行酒却須溫太真晚歲深交能有幾相逢爛醉莫辭貧

新條更有明年在重與東風作主人

歸鄉

窮巷歸來已白頭結茅何必榜休休好山當戶碧雲晚  
明月滿溪寒葦秋詩社縱添新句法醉鄉難覓舊交遊  
平生幸自無機械一棹夷猶去狎鷗

用前韻

愁來莫遣上眉頭著酒驅除醉即休未省一官堪送老  
已驚雙鬢不禁秋收心香火供清夢洗眼雲溪結勝遊

喚取短蓬乘晚興坐看煙浪沒輕鷗

庚午三月十日遊茅山

雨餘沙徑淨無泥策杖何妨過竹谿迎客野花隨處發  
勸沽幽鳥向人啼峰巒路轉攀蘿倦樓觀煙深望眼迷  
疑是武陵仙地隔坐來遐想舊桃蹊

老夫辭榮里居行年八十酒間漫成拙句述意而已  
不以示外也

莫笑尊前白髮翁曾騎竹馬戲元豐年彌八十癡頑在

身荷三朝寵眷隆綠野敢將前哲比香山幸有老人同  
興來尚欲尋幽去收拾殘春杖屨中

次韻王子飛跋石曼卿洛中題壁

酒狂翫世芙蓉仙胸中落落太古全浮雲富貴不著眼  
肯復騰上誇鳶肩應怪元龍負豪氣獻書天子言十事  
騎驢一去不可追風月淒涼壁間字

壽燭

代人上鄭相生日

凝香紅蠟大如椽華堂兩兩排金蓮漏澀銅壺寒夜永

光搖翠幄爭春妍蘭膏芳以何足道簾捲香風碧煙裊  
霜娥勿用拂麟鬚合就仙丹會難老我公身依日月光  
不假仙丹亦壽康煌煌神燭照天下光焰何止萬丈長  
世間爝火知無助想像丹輝爭欲賦可憐賤士老不才  
短檠見跋無佳句

次韻酬彥達

浮榮過眼風脫葉駕行無復清夢接柴門晝閉雀可羅  
寒日暉暉弄疎樾已種芳蘭滋九畹更遣胎仙舞三疊

李侯壯志亦可人舉目萬里欲橫絕醉眼時看石狡紫  
吟鬢半作霜棘折方今聖主躬儉勤奏賦不須誇羽獵  
中興盛事要磨厓老於文字誰踰結願君勉力上扶搖  
渺渺雲海出飛楫莫隨鍛翮卧窮巷漫學啼螢弔寒月  
次韻彥達對雪有感

朔風捲地寒雲繁忽驚空花墮簷間遠山歷亂眼中失  
飛鳥滅沒天際還緬想端門萬官賀雲陛儼列鳴珮環  
豐年獻瑞天一笑聲動四海俱歡顏李侯人物妙天下

何獨卧窮看屋山胸次冰壺自深瑩管中霧豹難窺班  
異時富貴恐不免詎忍空歌梁甫艱君看鴻鵠有高志  
一舉九萬誰能攀

對月

蓬鬢秋風老柴門轍跡踈誰同今夜月望絕故人書止  
酒愁元亮何心賦子虛得詩還喜誦習氣未全除

夜雨

夜雨妨清夢踈簷滴細聲幽懷無客語偶坐有琴橫水

濶柴荆迥風高雁鶩驚感時思報主材薄愧平生

日暮

地偏車馬靜門閉水雲深野艇收晴網卸春續暮砧危  
腸逢酒怯病骨畏寒侵又見鴉歸盡誰歌一作廢梁甫吟

月夜

漁火前邨近秋砧靜夜多山煙歸宿鳥水月動明波燭  
短催詩急樽空若客何抱愁眠不穩林影半牀過

次韻彥達折梅

信步尋梅約欣逢亞雪枝春藏紅萼小寒香暗遲畫  
角傳新曲妝臺歛翠眉廣平心不動唯許筆端知

歲暮

忽忽歲云暮霏霏山雨頻鳥啼茅舍靜梅映竹籬新陋  
巷無深轍清酤有善鄰中原消息斷聊與醉鄉親

次韻洪總領題花信亭得江樓

誰為傳花信新亭破睡風春回芳意早客到賞心同酒  
盞搖江綠詩箋照座紅無由接歡宴危坐正書空

次韻蘇晉翁見寄

不見梁王舊吹臺年來愁眼向誰開求賢廊廟無虛日  
報國涓塵自乏才直指漫能迎樞具永懷寧敢詠金罍  
相看鬢髮霜千丈自視文章水一杯晚歲可憐神氣索  
故人猶寄好詩來追還正始真堪喜突過黃初豈易陪  
婉孌也知能度曲葡萄應已釀新醅何時東閣容驚坐  
一日那辭一百迴

戲題所見

破睡輕風透碧紗實釵聊插任欹斜欲尋女伴嬉遊去  
試問秋千有幾家

次韻李道士觀南山

柴門無事畫慵開杖屨誰曾得得來隔岸野花隨處發  
護巢幽鳥傍林回

從丁世叔覓花栽

老去看花能幾回旋移花樹著行栽君家封植滿烟霧  
分我一枝春色來



兩宋名賢小集卷一百十九

欽定四庫全書

集部

兩宋名賢小集卷一百二十一至二十四

詳校官中書臣閔思毅

助教臣常循覆勘

總校官編修臣王燕緒

校對官助教臣汪錫魁

謄錄監生臣朱思

欽定四庫全書

兩宋名賢小集卷一百二十

宋 陳思 編

元 陳世隆 補

慶湖集卷上

賀鑄字方回衛州人喜談當世事可否不少假借人以為近俠博學強記工語言深婉麗密如次組繡尤長於度曲掇拾人所棄遺少加櫳括皆為新奇嘗言

吾筆端驅使李商隱溫庭筠常奔命不暇諸公貴人  
多客致之苟所不欲見終不取也初娶宗女隸籍右  
選監太原工作是時江淮間有米芾以魁岸奇譎知  
名二人每相遇瞋目抵掌論辨鋒起終日不能屈談  
者傳為口實元祐中換通直郎通判泗州又倅太平  
州竟以尚氣使酒不得美官悒悒不得志食祠祿退  
居吳下稍務引遠世故亦無復軒輊如平日家藏書  
萬餘卷手自校讎所為詞章往往傳播人口黃庭堅

自黔中還得其江南梅子之句以為似謝元暉自袁  
歌詞名東山樂府嘗自言知章之後且推本其初出王  
子慶忌以慶為姓居越所謂鏡湖者本慶湖也避漢  
安帝父清河王諱改為賀氏慶湖亦轉為鏡故鑄自  
號慶湖遺老有集二十卷

叢臺歌

按邯鄲縣譜叢臺趙武靈王築起地三百尺今故址  
猶十仞在縣中東北隅元豐辛酉七月同邑令濮人

杜儼仲觀登杜先有此詩要余同賦

累土三百尺流火二千年人生物數不相待摧頽故址  
秋風前武靈舊壠今安在禿樹無陰因樵采玉簫金鏡

未銷沈幾見耕夫到城賣君不見叢臺全盛時綺羅成  
市遊春暉一從凋輦閉荒艸蕭散行雲無復歸招魂想

像風流跡一作在晴華露蔓猶依稀登臨弔古將誰語城

郭人民令是非一作繁紜棘逕撩人衣禾黍晚來粗貉肥層簷碧瓦碎平地

夢作鴛鴦相伴飛

一作伴飛

彭城三咏

元豐甲子余與彭城張仲謀父東萊寇昌朝元弼彭  
城陳師仲傳道臨城王適子立宋城王狃文舉采徐  
方陳迹分咏之余得戲馬臺斬蛇澤歌風臺三題即  
賦焉

秦蛇已中斷劉項方龍戰叱咤沮風雲睢盱走霆電鴻  
溝一畫天地開楚王洗劒東歸來新都形勝控淮泗  
山絡谷營高臺重瞳登覽何為者不知招賢知戲馬上

如激矢下投丸蘭筋霜腕便回盤半夜悲歌駢不逝明日陰陵行路難驟牝三千歸漢苑粟豆尤聞蠹縣官君不見華山之陽古坰牧春風吹草年年綠

右戲馬臺歌

臺在郡城南

君不聞泗濱昔日有亭長送徒咸陽失收掌澤中置酒飲相訣吾亦從茲莽芒碭陰風蕭蕭導者懼前有修蛇怒橫路酒酣拔劒肯留行割斷蜿蜒不回顧河明月出人踵來彼嫗何寃號且哀謂遭赤帝屠吾子語竟莫知

安在哉真人聞此自心許茫茫四海吾其主虎變龍飛  
十二年馘項梟英蓋狐鼠半夜雄鷹飛上天幾見長陵  
一杯土

右斬蛇澤歌

澤在豐縣西二十里

漢祖高風百尺臺千年客土生萬菜無窮人事水東去  
如故地形山四來江淮猶沸鯨鮀血八十一車枉歸轍  
白叟逢迎皆故人牢酒歡呼惜將別崤澠迢遙非我鄉  
死生此地烏能忘酒闌鳴筑動雲物青衿兒曹隨抑揚

爾時可無股肱力端思猛士守四方君不聞淮陰就縛  
何慷慨解道烏盡良弓藏

右歌風臺詞

臺在沛縣郭內

江南曲

遊倡寥杜若別浦鴛鴦落向晚鯉魚風客檣千里泊當  
時桃葉是新聲千載長餘隔水情烏衣巷裏人誰在白  
鷺洲邊草自生

和潘幽老漢上屬目

白雲蒙山頭清川山下流芳洲采香女薄暮漾歸舟並  
蒂雙荷葉逢迎一障羞持情不得語大婦在高樓

雨餘晚望

相應乳鳩鳴桑間返照平明津小舫度高隴一牛耕林  
藪歸心健塵埃病骨輕屈驅魂爽在未許獨君清

侍曉朝謁天慶作

望曉謁琳宮荒庭霧氣濃曾陪羽林仗如侍景陽鐘薄  
宦情無幾勞生夢不容樵朋與漁伴他日會相從

擬溫飛卿

露網朱甍上風簾翠幙前宿食熏菡萏朝鏡拂漪連津潤銷金筆香依撲粉綿度間雙陸子撥恨十三絃鸚鵡殷勤語旃檀委曲烟絞綃乾玉筋魚鑰限金蓮團扇謌桃葉烏絲代杏牋朱門長宵宵白馬自翩翩難釣三珠樹徒拋七寶鞭酒闌應有待夢破即無緣信鵠新秋去孤蟾後夜圓浪言牆外地的是洞中仙

題張氏白雲莊

彭城張謀父居泗洲之東山耕田數百里中擇爽垲  
列樹松竹結茅其間榜曰白雲莊甲子九月置酒招  
余與寇陳王李子酒酣賦余得雲字

江左陶徵士高風昔所聞應慙五株柳難比一溪雲我  
有乘桴約君方植杖耘悠悠竟何得晚歲盍同羣

子規詞

長江靡施山坡陀旅竹荒松蒙雋蘿蠶初眠起風日暖  
梅弄黃時烟雨多山間有徑行逶迤倦客據鞍生睡魔

奈爾思歸啼鳥何子規鳥不如歸去好誰家西北起高  
樓幾為王孫怨芳草子規憐爾解歸飛我獨何心長不  
歸十年迹絕蘇門道夢裏舊遊知是非

廣張衡四愁寄李諫

夜如何其夜未央斗星燦兮河蒼涼明月入牖窺曲房  
候蟲刺促鳴我牀離憂歎來煎人腸綠琴在薦兮擬楚  
奏之沅湘朱弦濕露兮聲戾指而不揚我有所思兮在  
河之陽愛而不見兮衷難彌忘明璫玉案兮爾不我將

緘誠結惠兮久莫汝償永如牛女兮南北相望西風蕭  
颯兮凌百草以殞黃蘭萎艾裂兮恐被服之不芳念汝  
玉立兮賤組繡之文章元節日厲兮奈慘慄之冰霜胡  
不乘白雲兮歸來乎帝鄉尚何所僕兮畢永歲而彷佯

故鄴

按鄴都記漢建安十二年曹操滅袁氏始大築鄴當時京兆洛陽南陽許皆大都而鄴為之長操子丕代漢復定都洛陽此後僭竊更據鄴而未始殘破元魏

孝文帝自代南巡駐蹕鄴下久之以南望枉人山北接柏人縣非善地遂去之河南將行挂飯罌於城樓上識者解之挂飯懸飯殼也豈待玄孫宅此乎至孝靜帝果為高歡劫遷都鄴齊五主營建宮室規模壯麗逾前魏周武平齊焚撤略盡及楊堅克尉遲迴遂洿濬之築京觀於葛屨山徙郡治安陽鄴猶為屬邑熙寧間始廢之戊午九月獨遊晚歸馬上賦

魏武昔恢圖北平譚尚孽卜鄴築新都非徒為三穴將

行遷鼎志遽有分香訣落日總帷空奠終歌舞闋旋聞  
渥洛上載起蒼龍闕四葉不歸東苔花馳道絕食槽識  
終驗挂飯期先決擾攘百年間累車尋覆轍山川氣象  
變朝市繁華歇白露復青蕪茫茫換時節陰風吹葛屨  
燐火走丘血木葉下西陵寒蟲助騷屑

對酒

庚申三月晦澇陽賦

白駒不可駐尺璧非所珍獨挹盈樽酒悲歌送徂春歌

蘭酒亦盡回首跡已陳自笑十年仕尚迷沮溺津豈無  
濯纓水奈爾長路塵命也復何道令人猶昔人

閑情

紫苔生玉甃青窓隱夕曛佳人久不見翠被銷檀薰長  
巾拂綠綺上有三年塵聊彈別燕弄寄謝陽臺雲

燭蛾

雙雙一作鬼蛾來翩翩慕此堂上燭附炎竟何功自取焚如  
酷感彼萬動微保生在無欲不見青林蟬飲風聊自足

送陳傳道攝官雙溝

彌穢想登臨閒雲護日陰青蒲泗水濶古木漢祠深應  
醉盃中物誰聞澤畔吟禪坊養疴客輕別若為心

遊滕縣時氏園池

珍重西園主開門侍子猷城隅樹交蔭樓下水通流鵠  
鵠鳴深竹蜻蜓駐小舟可能忘夢想塵土滿徐州

自鄆還徐道中

八月過新雨行雲弄晚涼山川乍明晦禾黍半青黃西

去真何事東還非故鄉悠悠塵土裏無路不亡羊

丙寅舟次宋城作

水館雨邊村登臨奈斷魂黃花開小徑紅粉哭高原舟  
械逢新火松楸老故園斜陽一千里依約是蘇門

苦竹村南馬上

楚澤薰風後林阜夕照間漁船沿綠岸鳥道轉荒山久  
負盃中樂長偷馬上閒悠悠白門路何日杖藜還

題諸葛谼田家壁

地在烏江北八十里與江南石頭城相望

晚度孔明谼林間訪老農行衝落葉徑坐聽隔江鐘後  
舍燈猶織前溪水自春無多遊宦興卜隱幸相容

詒桂林從叔

江到三湘盡山圍八桂深龍蛇寒不蟄霧露晝多陰迢  
遞馳梅信殷勤訪竹林淮南風土美留滯亦何心

懷寄潘孝本兼簡其子言

春色先梅嶺秋深後桂林溪通五羊險雲近九疑陰無

雁難逢信有猿能伴吟曉春酒自美應對阿戎斟

宿黃葉嶺田家

聚落荒山裏畬田歲不登牛衣障隙雪鼠穴見隣燈愁  
入魚難暝寒凝酒亦冰悵然歌白石持枕待晨興

遊六合定山真如寺

達摩初祖道場

隻履西歸遠何年此布金地寒蒼檜老歲晏白雲陰燒  
隔溪冰斷樵穿徑雪深祖心無處問俗駕晚駿駿

湯泉道中

青石岡山下靈泉產藥苗  
山英如有待水落可相招  
蟬帶風移樹塵隨馬度橋  
颶鞭吟舊句歸路不知遙

艤舟當

一作當和江口

利口待風累日懷寄感

城中朋遊帆

一葉寄津口怒濤安可乘  
朝風占酒旆夜釻乞漁燈

牛渚逢新月秦淮想結冰  
故人他日夢歌吹滿金陵

金陵懷寄歷陽王掾

征虜亭邊路望夫山下舟  
長江不隔夢明月祇供愁促

席歌塵斷閒窓醉墨留惜芳橋畔柳誰繫木蘭舟

秦淮夜泊

官

一作

柳動春條秦淮生暮潮樓臺見新月燈火上雙

橋隔岸開朱箔臨風弄紫簫誰憐遠遊子心旆正搖搖

辛未興龍節日懷歷陽王掾元胥

昨歲東溪口扁舟欲下江伴愁燈映幔欲睡月侵窗漫  
寄書連紙誰同酒一缸何當見之子聊使我心降

秋夜聞雨晨興偶書

故國心馳北扁舟計漫東寒生一夜雨病涉兩秋風落泊蘿根葉幽憂屋角蟲何情悲節物聊自況衰翁

題蘭陵王碑陰

碑載王名肅字長恭北齊文襄之子按北史直書長恭而沒其名蓋當時以字行而史失其詳爾王有武畧善撫士每得一爪數李必分甘餌衆金墉城之戰免胄先登推功第一令蘭陵王曲即凱歌也為後主所忌得疾不治而卒以鳩薨碑陰刻王弟延宗一詩

甚哀墓在滏陽西南十里道占其東夏潦所湊壠已  
半圮碑字大兼小隸法有古氣而不著書人名文乃

盧思道也庚申九月十日賦

齊室生武賢蘭陵類頗牧折爪饗虎士饜慰比梁肉金  
墉免胄戰破陣何神速樂府有遺聲當歌凱旋曲磐宗  
既不壽霸祚宜爾促十代六百年人間變陵谷荒塗接  
幽壠誰復禁樵牧空石半敲推鉤鋤斷鼈足蒼苔蝕瑑  
刻仰睇眩塵目操翰無愧辭千言不為辱人生妄區別

共盡同草木何待雍門彈令君淚盈掬

兩宋名賢小集卷一百二十